



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma : Tir Yimyim

tiryimyim@aolima

tir yimyim

TAPAK 8

Kinungtsü ajurutsü atema Manish
Sisodia dang mela, saka majurutet

Mourinho-i referee merenshiba
atema UEFA-i ken o benok

VOL. XX NO. 232 (ADOK 232)

DIMAPUR

AMUNGNÜ (SUNDAY)

AAMI (JUNE) 04 2023

₹ 5.00

Minority Educational Institutions atema shisalemsatet

Kohima, June 3, 2023 (TYO): Nagaland Department of Higher Education (DoHE)-i Honibarnü Interaction Programme ka ayongzüka agiogo.

Iba sentong ya National Commission for Minority Educational Institutions (NCMEI) aser State Competent Authorities o Minority Educational Institutions atema liasü.

Niathu Resort, Chumoukedima nung ayongzüka agiba sentong nung Assam, Arunachal Pradesh, Manipur, Meghalaya, Nagaland, Mizoram, Tripura aser Sikkim nungi teshimet nübotem aden.

"Prime Minister Narendra Modi-i North East Region ajunga atema Pradhan Mantri Jan-Dhan Yojana (PMJDY) amala scheme tem tenzüktüogö" ta Union Minister of state for education Dr. R. R. Singh-i ashi.

"Ajak renloktü atema shisaliok ya tongtipang hadir ka lir aser shisaliok ajanga nisung ajak renloker. Arrla 30 Clause 1 ajnaga tamangba yimsü aser oshio ben nung tangar memenepertemo pei reju lapoktsü temelaba agütsür" ta paisa ashi.

"Anungji nübortemi iba maangka agitsüla aser shisaliok melamela angazüktü asoshi rejutem lapoktsüla. Tanü tashi nung India nung kin 6 tashi Minorities ta ajiteta lir. Missionary School temi meta talang pilar alidak shisaliok sayuba atema tenüngsang agütsür" ta pai ashi.

National Education Policy 2020 ya terenlok atema aser shisaliok rejutem ajanga kaketshirtem tajungba anitetsü

nükjidong nung yangluba lir, ta Union MoS-isa ashi.

"Asenoki Artificial Intelligence (AI) aser regional language ajanga angazüktü renema alitsüla aser iba sentong nung adenertermi education system tajungba kümdaktsütsü atema tebilembatem lemsateptsü ayongzüker" ta Dr. R. R. Singh-isa metetdaktüsü.

Iba sentong nung NCMEI chairman Justice Narendra Kumar Jain-i 'right to free education' indang jemi.

"Below Poverty Line (BPL) tanurtem school züngdaktsütsüla aser iba sentong nung adenertermi Education Policy aser Act meteta alitsü tim" ta Jain-i ashi.

"India sorkari 2030 küm tashi nung 100% enrolment asütsü meranger. Linük ka indang rongsenketzüng tashitait aser jungjunga amenteta lira tangari akhümtsübur. India nütsüng yongsük 50% tashi religious minorities lir" ta paisa ashi.

"Nagaland nung iba sentong agitsü shimteta atema Union Minister dang pelar aser pai temelenshi aika bener aruba atema tenüngsang agütsür" ta Higher & Technical Education Commissioner & Secretary Anenla T. Sato-ia ashi.

Jain nungeri Nagaland nung S.D. Jain educational institutions lapokba aser shisaliok tajung sayuba atema pelar ta Anenla-isa ashi.

Iba sentong nung nisung 200 shi aden aser School Education & SCERT, Nagaland commissioner & secretary Kevileno Angami-i anküp tepela o jemi.

Odisha train lendong nung nisung 288 asü; 900 tema yiru



Balasore district kübok Bahanaga Bazaar station nung June 2, 2023 aonung train asem tsüktepa sülen Honibarnü rescue operation inyakba angur.

Balasore/Bhubaneswar, June 3, 2023 (Agencies): Odisha kübok Balasore nung train asem tsüktepa lendong nung nisung 288 asü aser 900 tema yirua lir ta DGP Fire Service Sudhanshu Sarangi-i ashi.

Hokolbar aonung 7:00 ako meta passenger train ana-Bengaluru-Howrah Superfast Express aser Shalimar-Chennai Central Coromandel Express den ano khu abenba train ka tsüktepa. June 2, 2023 aonung Odisha kübok Balasore nung train tsüktepa ya India nung küm 20 sülen train lendong tulutiba aser India nung train lendong tulu atalokba rongnung pezübuba liasü.

Lendong atalokba tesem nung rescue operation temogo aser tang lenmang yanglushiba maparen tenzükgö ta Ministry of Railways-i Honibar nümetetdaktüsü.

"Balasore, Mayurbhanj, Bhadrak, Jajpur aser Cuttack district tem nung nisung 900 tashi mozü ki balala nung anepaludar" ta Odisha Chief Secretary Pradeep Jena-i ashi.

"Tasü mangtem pei pei kinungtertem nem agütsür mesüra pei pei talidak bener yokdar. Mejangjatetba tasü mangtem

atema statutory procedure inyaktsü" ta pai ashi.

Balasore district kübok Bahanaga Bazaar station nung iba lendong ya ataloka liasü. Odisha nung train lendong atalokba sülen Prime Minister Narendra Modi-i kanga dang temaba jenjang nung senden ka ayonga menogo.

Tang PM Modi-i Odisha nung lendong atalokdak Balasore semdang aser iba sülen Cuttack nung mozü ki balala semdanga liasü.

"Iba lendong atalokdaktsürtem ozüng tesashi agi merenshitsu. Iba lendong nung taküm samar kibongtem den sorkari mangyim lemsateper" ta Prime Minister Narendra Modi-i lendong atalokba tesem semdanga sülen ashi.

Iba maparen nung yariteptsü atema Army indang teyaria meshia liasü aser National Disaster Response Force (NDRF), Odisha Disaster Rapid Action Force (ODRAF), den fire units o ambulances aikati yaritep.

Honibarnep Union Railway Minister Ashwini Vaishnav Balasore tonga aru aser osang metetpelatapa liasü.

Odisha CM Naveen Patnaik-ia lendong atalokba tesem semdang aser Balasore district

hospital nung anepalurtem semdanga liasü.

Yasüng 7:00 ako meta Howrah-i aoba 12864 Bengaluru-Howrah Superfast Express nungi taktang aika lenmang nungi lungpeta tugu aser 12841 Shalimar-Chennai Central Coromandel Express den tsüktepa. Idangji freight train ka arua train ana den ano tsüktepa ta Odisha Chief Secretary PK Jena-i ashi.

Odisha Chief Minister Naveen Patnaik-i June 3 nü 'one-day state mourning' asütsü sangokja liasü.

Railways Minister Ashwini Vaishnav-ia tatalokba atema bushisüngdang ka asütsü tetuyuba agütsüogö.

Commissioner Railway Safety, South East Circle A M Chowdhary lenisüba kübok bushisüngdang asütsü ta Indian Railways-i metetdaktüsü.

Indian Railways-isa tasür kibong shia nem Rs. 10 lakh, kanga mejungi yirur nem Rs. 2 lakh aser terara yiru nem Rs. 50,000 teyari agütsütsü metetdaktüsüogö.

Külen, PM Modi-ia PM's National Relief Fund (PMNRF) nungi tasür kibong shia nem Rs 2 lakh aser yirua alir shia nem Rs 50,000 teyari agütsütsü osang metetdaktüsü.

ANCSU unit temi wako tanak atsüketer



Dimapur, June 3, 2023 (TYO): May 27, 2023 anepdang NSF aser ANCSU office raksatsürtemi tenüng agia metetdaktüka tanü tashi ozüng amertemi teinyaktsü mapa meinyakba atema tejashi sayua aser temeten meshia All Nagaland College Students' Union

(ANCSU) indang unit temi pei pei college nung wako tanak atsüketogö.

Ozüng amertemi aibelenertem ozüng tapet agi memerenshi tashi onoki iba mapa inyaktsü ta Media Cell, ANCSU-i sangdong ka nung metetdaktüsü.

Nagaland nung NE Global Investors Summit '23 agi

Dimapur, June 3, 2023 (TYO): Nagaland sorkari Ministry of DoNER, Government of India den külemi North East Global Investors Summit, 2023 indang State Round Table ayonga agiogo.

Iba sentong ya Honibarnü Rhododendron Hall, Police Complex, Chumoukedima nung agia liasü.

Iba senden atema Hokolbarnü investors tsüngda olemtep liasü aser parnok sorkar department aika den tejak shiyutepa liasü. Investors-isa department tem den parnok inyaknuba wadangtem indang lemsateper aser iba nung solar energy, marketing agro produce particularly millets, skill

development in aviation amala onüktem dena liasü.

Ano, Nagaland Chief Secretary J Alam menden ser Centre sorkar ketdangtsürtem den senden ka amen. Idangji Chief Secretary-i Nagaland indang osangtsüsang lemsateper aser tang teinyakdak mapatongtem den ano inyaktsü alibattem metetdaktüsü.

Chief Secretary-isa identified potential areas 18 indang osang lemsatepdang food processing & agro-produce, sericulture production, mineral-based industries, tourism, handloom & handicraft, floriculture aser bamboo-based industries indang metetdaktüsü.

Senden nung adenertermi

Nagaland nung pineapple fiber, plug-and-play facilities, hotels, agro-based processing centers, storage facilities aser ano tanga maparen inyaktsü lenmang alibattem lemsatepa liasü.

Secretary DoNER, Lok Ranjan-ia Nagaland dang maparen inyaktsü aliba maongkatem jungjunga bushiteptsü aser mapa inyaktsü asoshi renemshitsu ayongzüka liasü.

"Nagaland nung alirtem aser talisa lanurtemi inyaktsü tejangraba aika lir anungji state sorkari item tejangraba asoshi lenmang lapoktsütsüla. Nagaland-ia tanga state tem den tajungleni tokteptsü sobaliba benshitsu" ta Ranjan-isa ashi.

Mangkolemba SDPDB senden menogo



Mangkolemba SDPDB senden alidang tangokba noksa angur.

Dimapur, Aami/June 03 (TYO): Ita shia amenba Mangkolemba Sub-Divisional Planning and Development Board (SDPDB) senden June ita atema Customary Law Court, ADC Office Complex Mangkolemba nung ADC & Vice Chairman SDPDB Mangkolemba T Lankosen Tsanglao lenisüba kübok mena liasü.

Iba senden nung Minister, Tourism & Higher Education aser Chairman SDPDB Mangkolemba, Temjen Imna Along aser Advisor, Transport & Technical Education, Temjenmenba dena liasü.

Iba senden nung CHC Longchem, PHC upgrade asütsü; CHC Tsurangkong, PHC upgrade asütsü; GHS nungi GHSS Longchem dangi

upgrade asütsü; GHS Tsurangkong nungi GHSS upgrade asütsü; Longchem nung CMO quarter asütsü; Merangmen nung Supply Godwon yanglua amenoktsü; EAC Longchem nungi SDO (Civil) dangi upgrade asütsü; CHC Mangkolemba nung atsü atsütsü aser arütsü nung wall yanglutsü atema teyari asüngdangtsü; Sub Fire Station Mangkolemba amenoktsü; Longchem nung aliba Dobashi Customary court yanglushitsü; Tsurangkong nung Border Magistrate quarter tasen yanglutsü; Planning Officer aser Tourist Officer nungdakba aser Tsurangkong tsükong kübok Government tesayurtem transfer aoba ajanga tesayurtem agi anüngba

indang onüktem jembia liasü. Iba senden nung jembidang, Mangkolemba SDPDB ya 'independent planning board' ka asünung tsükong asem nungi Village Council züngsemtem, VDBs aser department balala nungi HoOs tem dena subdivision ajungkettsü asoshi agenda benoka metokmeperi lemsatepba nung shilem agitsüla, ta Minister Temjen Imna Along-i ashi.

Advisor Temjenmenba-ia HoOs tem dangi pei mapa bendanga agütsür takok ngua inyaktü ajungshia liasü.

Iba senden nung Mangkolemba, Longchem aser Tsurangkong BDOs aser SDO Water Resources Mangkolemba ajanga PowerPoint presentation agüja liasü.

Raj Bhavan nung Telangana Foundation amung

Dimapur, Aami/June 03 (TYO): Telangana state kumteter küm ter ajungba anogomung Dr. Imkongliba Ao Hall, Raj Bhavan, Kohima nunga June 2, 2023 nü Nagaland Governor La Ganesan den Raj Bhavan officers aser staff aser Nagaland nung aliba Telugu kin temi munga liasü.

Iba anogomung nung jembidang Telugu kin temi sentong nung shilem agiba atema aser Telangana nünur ajunga den Governor-i tepela lemsatepa liasü.

Pai ashiba agi, Ato Kilonser Narendra Modi-i teti state ajunga indang heritage aser sobaliba benjongba nung temolung agütsür, koba pa indang "Ek Bharat, Shreshtra Bharat" sentong ka lir.

State aser UTs balala indang sobaliba, yimsüyimpong aser yimya balala dangar dang sayuba aser angazükdaktsüba ajanga tangatetep tali tajungba akumtsü aser state tem tsüngta

tesendaktep takangba kuma India nung telungjem tali adoktsü, ta pai ashi.

India ama sobaliba, süposolemtsü, chiyongtsü aser kin tabu balala aliba linük nung state balala nungi nüburtem tsüngta ajurutepa metettepba aser angatettepba nung tashi aittsüla, ta Governor La Ganesan-i ashi.

Sobaliba balala indang awareness agi anünga aliba apu latsütsü aser India nung tabu balala akumtsübotsü asoshi iba sentong ya akar, ta pai metetdaktü.

Nüburtem kong lidir liaka pei state indang benkongtsü tim, ta pai ashi.

Pai ashiba agi, Telangana state ya June 2, 2014 nü tentet. Pai Telangana state nung tzü, aluyimba, power supply, healthcare aser GSDP nung takok anguba indang lemsatepa liasü.

Telangana nungi Nagaland

state angazüktü jenti lir, ta pa ashi.

Paisa Telugu kin dang Nagaland ajungtsü asoshi mapa tajung inyaktü ajungshia liasü.

Iba sentong nung Secretary to Governor, Rajesh Soundararajan IAS ajanga tarur pela agizükba o jembi aser Government of India totuyuba nung iba sentong Raj Bhavan nung ayongzük, ta ashi.

Iba sentong nung Deputy Director, Agriculture, Govt. of Telangana (Retd.) Rajentra Rao ajanga Telangana state amenokba indang rateta ashi.

Sentong nung G Mohan Rao aser M Hemalath nungeri Telugu nunger sobaliba ken aten, B Bhoomika & Group aser B Akshay & Group ajanga Telugu sobaliba tsüngsang agi shilem agi. Iba sentong nung SO, Jochule menden liasü aser CH Dharma Rao-i melepzüng o jembia liasü.



Honibarnü Dimapur nung aliba Rotary Club nung 'persons with upper disability' atema angati LN4 prosthetic hand fitting camp ka ayongzüka agiba mapang tangokba noksa ka nung Advisor, Law & Justice and Land Revenue, T.N. Mannen; Deputy Commissioner, Dimapur, Sachin Jaiswal aser teyari agirtem angur. Iba camp nung nisung 50 shi nem angati prosthetic hands agütsü. Iba camp ya Rotary Clubs of Dimapur, Kohima, Mokokchung, Imphal, Jorhat, Golaghat, Kolkata, Akhil Bharatiya Marwari Mahila Sammelan, Golghat aser District Disability Rehabilitation Centre Dimapur lungjemer ayongzüka liasü.

MOLUNGNEN O



Late IMLITEMJEN LONGKUMER
Asoba: 20th August 1955 - Asüba: 30th May 2023

Ozü Tsürabur asür **Wb. Imlitemjen Longkumer** (Ungma) shirangba mapang nungi asüba anogo tashi adianu, tembar, kiyonger aser temeimertem shirnokisa ozü asüko mangyim mapang shisatsü, rongsem, nüpu aser sarasadem ajanga yariogo, nenok ajak dang tepang agi meshitetba tepela tulu lemsateper.

Tsüngrem tulusangi nenok ajak moajangma.

- Temeim kinungtsü, Chirnurtem, Semchirtem aser Kinungertem.

Kohima nung June 5 nü lokti nübuttsük alitsü

Dimapur, Aami/June 03 (TYO): Ministry of Housing & Urban Affairs (MOHUA) ajanga totuyuba agütsüba ama aser MeriLiFE, M e r a S w a e h h S h e l u i r campaign tembangtsü asoshi June 2, 2023 nü Ward ktdangsurtem den senden amendang lemtetba ama, World Environment Day nungntem nung June 5, 2023 anepdang 6:00 ako nungi tenzüka Kohima Municipal Council kübok Ward 19 prong nung lokti nübuttsüka

mürekmeju mapa inyaktü, ta sangdong ka ajanga ashi.

KMC Inspector temi Ward ajak semdangtsü aser ibaji annual "Cleanliness Competition" nung inoktsü.

Anungji Wards, Sectors aser Colony ajak dang pei kiyong nung Cleanliness drive ayongzüktsü metetdaktü. Kohima municipality nung aliba nübur ajak iba sentong nung longsoa shilem agia Kohima mürka ayuba nung amalitep akatsü ayongzükter, ta sangdong ajanga ashi.



Honorary Secretary, Dr S.S. Akaba Longchar-i anir IRCS Mokokchung District Volunteers temi June 2, 2023 nü Khensa yimtsüng semdanga yangji kitsük-kirong lendong ka nung ki mitsü kuma rongdoker aliba kibong asem semdanga liasü. Iba mapang parnoki kidang amshiba osettsüset, temang mürekmejuba aser jang amala teyari agüja liasü.

Assam Rifles temi sentong balala ayongzük

Dimapur, Aami/June 03 (TYO): AOR indang tali tejangjaba nung metetdaktütsü aser security tensa indang jembishinütsü atema COB Wakching ajanga village chairmen, GBS aser tongtipang nisungtem den sensaksemba sentong ka ayongzüka liasü. Iba mapang nüburtemi timtem balala ajuruba indanga lemsatepa liasü.

Iba sentong nung police, GBS aser village council züngsem densema nisung 35 dena liasü.

Tang Manipur nung tensa mejungi aliba ajanga parnok aliba tesem nung security dak sendakba ken o balala jembitsü nükjidong nung iba sentong ya ayongzük aser tarutsü nung timtem majurutsü asoshi osangtsüsang lemsatepa liasü.

Iba sentong nung lokti tentet balala nungi nisung 23 dena liasü.

Iba mapang Security Forces aser nüburtem tsüngta tangatetep tajung nung alitsü atema jembi aser sentong nung adener dang kumdanga alitsü indang shia liasü.

HQ IGAR (North) kübok Assam Rifles temi June 2, 2023 nü Peren district kübok Benereu yimdak Security Meet ka



June 03, 2023 nü Odisha nung train lendong tulu atalokba sülen Ato kilonser, Narendra Modi-i senden ka ayongzüka amendang tangokba noksa nung angur. Kasa noksa nung Union Home Minister Amit Shah-a angur.

PM Modi-i Odisha nung train lendong atalokba tesem semdang

New Delhi, Aami/June 03 (Agencies): Honibarnü Ato kilonser, Narendra Modi-i Odisha state kübok Balasore nung train lendong atalokba tesem semdangogo; pai Cuttack hospital nung yirua alirtem semdangba sülen senden ka ayongzüka amen.

Modi den Railway Minister Ashwini Vaishnaw aser Union Education Minister, Dharmendra Pradhan nata liasü. Vaishnaw den disaster management team-i train lendong atalokba sülen kümzüka maparen inyakba osang tejanga Modi nem metetdaksü.

Tesülen osangbenertem den jembidang Modi-i, "Aibelenertem nem temerenshi tulu agütsüsü," ta metetdaksü.

Honibarnep Ato kilonseri Odisha train lendong dak sendakba nung senden ka ayongzüka amen aser iba senden nungji Union Home Minister Amit Shah den tongti ketdangsertem kar aden.

Hokolbar aonung Odisha kübok Balasore district nung Bengaluru-Howrah Superfast Express train, Shalimar-Chennai Central Coromandel Express aser khu abenba train tsüktepba lendong atalokba sülen tang tashi nung asür 288 jungogo aser nisung 900 dak tema yiru.

Yasung Ato kilonser, Narendra Modi-i twitter ajanga mangyim jashi lemsatepa, "Odisha nung train lendong atalokba atema jashir. Iba ama mangyim jashi mapang nung ni

mangyimer kibongtem den tejashi lemsateper. Yirua alirtem tekaraba nung aneptsü ni sarasademtsür. Railway Minister @AshwiniVaishnaw den jembioogo aser iba tensa metetpelaogo. Lendong atalokba tesem nung kümzüka maparen teinyakdak aser takoksa angurtem nem akokba tashi teyari agütsüdar," ta metetdakja liasü.

National Disaster Response Force unit 3, Odisha Disaster Rapid Action Force units 4, fire rescue team 15, doctor 30, police 200 aser ambulance 60 amshia kümzüka maparen inyaka liasü.

Opposition party balala nung lenirtemia iba lendong nung takoksa angur kibongtem den mangyim jashi lemsatepba den külemi railways signalling system majungba atema aitsüogo.

TMC otongdar, Saket Gokhale-i twitter ajanga, "Odisha nung Coromandel Express & Yashwantpur-Howrah train tsüktepba lendong osang angashia aoksar aser jashir. Iba lendong ajanga takoksa angur kibongtem atema sarasademtsür. Signal system aibelenba ajanga train asem tsüktepba ya taoksatsü osang ka aser mamangteter. Iba tatalokba atema tasüngdangba akatsü aser telangzüba agütsüsü nungdak," ta metetdaksü.

CPI(ML) general secretary, Dipankar Bhattacharya-ia, "Joko asenok Indian Railways nung signal aser safety system

mali asü? Mesüra India nung item ama lendong ya yimya ka dang akümtsü. Takoksa angurtem nem telangzüba agütsüstüla," ta metetdaksü.

CPI MP, Binoy Viswam-ibo iba tatalokba atema Railway Minister, Ashwini Vaishnaw-i minister menden nung anentsüla, ta takhangba agütsü.

Binoy-i, "Sorkari luxury trains nung ang temelung agütsür. Sensakertem amenba train aser train lenmangbo sendoka yutsür. Ibayongji Orissa nung nisung aika asü. Rail Minister-i anentsüla. Luxury trains nung ang temelung agüjang. Sensakertem amenba train aser train lenmangbo sendoker," ta metetdaksü.

BJP Tir, JP Nadda-i twitter ajanga, Centre nung BJP sorkar küm 9 ajungba sentong aika agütsü liasü, ajisüaka iba lendong atalokba ajanga item sentong atsülanger, ta metetdaksüogo.

Congress Tir, Mallikarjun Kharge aser taoba mapang Congress Tir Rahul Gandhi natia iba lendong atalokba atema mangyim jashi lemsatep aser Odisha nung party lenirtem aser party nung inyakertem dang akokba tashi yariteptsü metetdakja liasü.

Train lendong dak sendakba nung RJD lenir aser taoba mapang Union Railway Minister, Lalu Prasad Yadav-i, "Iba tatalokba ya temaba jenjang nung bushisüngdangtsüla aser aibelenertem nem temerenshi agütsüstüla. Parnoki Railways raksatsüogo," ta metetdaksü.

METETDAKTSÜR

Mrs. Nungshisangla Longchar D/o Mr. Roasashi Longchar (Süngratsü) dang shirnokisa sen apuja ali, ibaji onoki memetet aser kuli asütsü makok ta metetdaksür. Maneni, tanü nungi kinungertemi la jendoker aser onoki la indang khuret kecha mabentsü.

Sd/-

Mr. Roasashi Longchar aser kinungertem.

Congress sorkar mapang linük security mejungi liasü: Anurag Thakur

New Delhi, June 03 (Agencies): Hokolbarnü Information & Broadcasting Minister, Anurag Thakur-i, Congress-i yimsüsüba mapang nung linük security mejungi liasü; Congress yimsüsüba mapang nung linük defence nungdakterem miim osang tangartemi meteta liasü, ta metetdaksü.

Congress lenir Rahul Gandhi-i India nung osangbenertem sadoka inyakba temeden jenjang majung, ta aitsüba dak sendakba nung Thakur-i, iba atemaji linüki rating agencies mesüra taoba mapang Congress Tir (Rahul Gandhi) ama shisa makaba nisungtem dang nungi certificates menügdaker, ta ashi.

Thakur-i twitter ajanga, "Rahul Gandhi-i sponsor asüba osangbenertem interview ka nung pai tiyazü nung India tenüng menüksüogo aser India nung miim osangtem international agencies dang ayokba atema oziung benokba agency-i apuba journalist ka pusemstü atema linük nung osangbenertem temeden jenjang majung ta jembioogo," ta aitsü.

"India-i olulu prokba media house, rating agencies mesüra

Rahul Gandhi ama shisa makaba nisungtem dang nungi certificates menügdaker," ta pai ashi.

BJP lenirisa, "India aser Ato kilonser Narendra Modi-i aniba sorkar tenüng menüksüba ya kanga majung, linük security alema inyakba ya oziung alema lir, ajisüaka yamaji inyaktsüsa pa (Rahul Gandhi) tenük kanga pokogo," ta ashi.

Tang Rahul Gandhi-i US semdanga lir. Pai US nung universities balala nung kaketshirtem den jembioogo, yangji aliba sensotem den jembioogo aser osangbenertem senden nung jembioogo.

Rahul Gandhi-i, Indian Union Muslim League ya "secular" yimtenren party ka lir, ta jembio.

"Pai mapang ajak nung India tenüng menüksütsü atema bendanger li shimmer. Congress yimsüsüba kübok India nung linük security miim osangtem prok, aser tangartemi asen linük defence nungdakterem miim osang meteta liasü. Congress nungi 'Yuvraj' ya akhi putu nung alir, kong kiralongrartem Ato kilonser den salemdaktsütsü atema Prime Minister's Office-ia jaoka liasü," ta Thakur-isa aitsü.

Kinüngtsü ajurutsü atema Manish Sisodia dang mela, saka majurutet

New Delhi, June 03 (Agencies): AAP lenir aser taoba mapang Delhi deputy chief minister, Manish Sisodia kinüngtsü shiranga temang tamajungba akümba agi la semdangtsü atema court-i pa nem temelaba agüja liasü saka majurutet.

Honibarnep Tihar jail nungi Manish Sisodia par kidangi ao saka pa ki atongdangbo pa kinüngtsü temang tamajungba akümba agi hospital-i anir oor liasü.

AAP osang ajanga ashiba agi, Sisodia kinüngtsü, Seema shiranga liasü saka ano temang tamajungba akümba agi hospital-i anir ao. Taoba ita nunga la hospital nung monga liasü.

Party osang ka ajanga, "La LNJP Hospital nung aliba emergency ward-i anir ao. Sisodia-i pa kinüngtsü ajurutsü atema jail gari ka nung anepdang 9:38 ako nung AB-17, Mathura Road nung aliba par ki tonga ao. Security sepaitemi pa meina par kidangi anir aoba sülen pa ki telungi ai, ajisüaka pa kinüngtsü temang

tamajungba akümba agi hospital-i anir aoba ajanga pai la majurutet," ta metetdaksü.

Hokolbarnü Delhi High Court-i AAP lenir Sisodia nem pa kinüngtsü ajurutsü temelaba agüja liasü. Delhi excise policy ken o dak sendakba nung pa jail nung puoka liasü.

Justice Dinesh Kumar Sharma-i Tihar jail superintendent dang Sisodia par kidangi anir oa pa kinüngtsü den ajurutepdakjang; kinüngtsü ajurutsü atema anepdang 10:00 ako nungi nikongdang 5:00 ako tashi pa nem temelaba agütsür, ta metetdakja liasü.

Delhi excise policy ochimashi ken o dak sendakba nung taküm February 26 nü Central Bureau of Investigation (CBI)-i Sisodia pua liasü. Pai high court nem bail temepishiba agütsü saka May 30 nü bail temepishibaji magizük.

High court-isa Sisodia-i osangbenertem den mejembitsü aser par kinüngertem dak alaka tangar den jembitsü memela, phone aser Internet amshitsü memela.



June 03, 2023 nü US Capitol, Washington nung Congress lenir, Rahul Gandhi-i Indian American nungertem den jembidang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, AAMI (JUNE) 04, 2023

0 tebandang aser mang teyang

Tsüngrem tsüngdang asenoki asenoksasa inyaktsü memelaba mapa kar lir. Item rongnungji obendang agütsüba aser mangyangba na ya tongtibang teinyaktsütem rongnung dena lir. Atangji, tangar mapa nung obendang agütsütsü aser tangar dak mang ayangtsübaji asenoki inyaknüba aser jangraba mapatem asütsü akok saka item khurettemji Tsüngremi asen melen inyaktsü agizükadokogo. Anungji, asenoki Tsüngremi nung ta ashiba mapatemji inyakra asenok Tsüngrem nungi ochiobendang angutsü melen temerenshiang angutsü aser asen dak tamajung inyakertem dak Pai mang ayangtsü melen meyiper asenokang temerenshi angutsü. Asenok taküm libaliro nung tekümdangtsü mapatemji itemji asütsü. Mathi tapu 7 nung, nai tangar obendangtsüba den kasasa na obendangtsü ta bilema nai tangar o tebandang ta shia aliba angutsü. Ibaji, atangji, tajidaktsüka aser tarendaktsüka lir, kechiyong aiben asenoki asenok dakbo tai mali ama bilemer aser tangar tai aser parnokki aibelenba dang bilema parnok aitsür aser nüngsen jembitsür. Aji oda, asenoki tangar dak tai anguba amaji Tsüngremi asen tashimait repranga obendang agütsü nungbo asenok kodanga Pa tsüngdang memetentsüsa alinungji, asenoki asen tashimait meteta tangar obendangtsü melen tadokang agüjang ta ashir. Ibayongji, Tsüngremi asenok nem tangari asenok dak kechikomaka tai inyakdir inyakaka mang ayangtsüba shilemjibo Pa nem tokjang ta Rom tapu 12: 19 aser Tazüngkunem tapu 32:35 nung shia angutsü. Asenoki angatetsüba kaji, asenok dak asen tai mali ser tamajung inyaker aser ashioktsürtem dak mang mangyangtsü ta masü saka parnoka parnok mapa yari mang ayangtsübasa saka ibaji Tsüngremi ayangtsü, anungji pa mapa südakjang ta ashir. Ibajisa tajungba. Aiben asenoki asenok dak tamajung inyakertem anema tamajung inyaktsü matatetter, tangsa tang mangyangner. Atangji, ibaji meimchir yimya. Ajisüaka, asenoki Tsüngrem dak amangra, iba tamang jagi asenoki Tsüngremer mapangji atatetsü. 2 Peter 3:9 nung ashir, " Tsüngremi asenok dang nangzükba inyaktsü asoshi Pai memenor, ajisüaka Paji talangka atapisaa aremzüka ataba Tsüngrem lir," ta shia angutsü. Ano, 2 Korint 5:10 nung, " tatabang nungbo nisung shiai peii inyakba mapatem indang kuli agütsütsü," ta shia angur. Atangji, alima nung asenok nükdang asenok dang tamajung inyakertemang tajungba, takarba aser jangrattemba lia aor. Idangji, asenok mulung yirur aser Tsüngrema mali amato bilema alitsüa akok. Ajisüaka, T.Ken 37 nung ashir, " tamajunger asoshi shisatebulu mesüra shiri tamajung inyaker parnok tenükshi, kechiyong kopi melii parnokki ayi ama akongtsü aser parnokki Lebanon nung Cedar süng ama kodanga melaotsü aser mesamatsü amai liaka, parnokki tera tashi atsüdoktsü aser nenoki parnokki kong meyia liasüar iba tesemji dena mangutsü." Tsüngremji ochi Tsüngrem, Pai nisung shia nem pei mapa yari alima nung taküm alidanga aser sür külena obendang agütsütsü. Pai asenok atema mang yangtsütsü. Asenoki mangyangtet meyangtet kecha mali, shibai aser shirnoki asenok tai mali ser nung asenok anema inyaker, parnok anema Kibubai mang ayangtsü. Aji oda, asenoki matateti tamajung inyakertem dak mang yangra, iba jagi asenoki Tsüngrem dak mamangba kuli sayur asütsü. Ajisüaka, Tsüngrem dak amanga kodang asenoki tangar dak mangyangtsüba mapaji Pa nem toktsüdir, idangjiang asenok mulung anisüngzüksü aser tepela arutsü. Ashiko, asen mulungjangi Tsüngremer mapang matatetsüsa inyaktsü ajungshitsüa akok, saka ibaji asen tsükchri ajungshir ta bilemstsüla aser mangyangtsüba mapajibo Tsüngremer shilem ta bilemtetsüla.

OLEMSABANG

MOATSÜ ASER TSÜNGREM-MONG BENJONG YA WAZÜKA AYUTSÜLA

~ L.Kika Pongener

Tanü asen putu nung asenok Khristan tamangertemi Moatsü aser Tsüngrem-mong amongba ya karibo temenen aser tai amai angateter. Ano tip külen tanü lanur tashitemetertemibo Moatsü aser Tsüngrem-mong ya asen sobaliba nung tongtipang benjong lir, anungji iba benjong ana ya mesamadaktsüi wazüka ayutsüla-a ta ashir. Aji oda, Moatsü aser Tsüngrem-mong amungbaji limapur yimsu-yimpong benshir amai angatetba, iba tangatetba nungji mapang ka nungbo yimtsüng karibo iba benjong ya memungi senzüka tokja aliba, tanübo angateta arur yimtsüng ajak nung asentenshia amunger. Terasatsüka, asen limai Khristan yimsu arur, iba yimsu agizükdang aibelenba angateter, Moatsü aser Tsüngrem-mong ya temenen amai sentoka-adok. Asenoki laishiba nung reprangra, Israel nunger-a par sobaliba benjong aika munga aruba angutsü, aser item benjong rongnung ajak dang tongtipangba benjong kaji "Piyazü minokba amtsük benjong" ta-ka ajar, "Suia aoba benjong" ta-ka ajar aser "Kümtetsü benjong" ta-ka ajar. Iba benjong ya par sobaliba nung kanga metsüngareta amongba aruba benjong ka lir. Par tetsü-tebou nunger Ijip lima alar tia nung aliba, Mosai anir Kannan limai apusoba aonung, aritepa piyazü minokba amtsük takong asangtsü, aser san tepseta iba azü (Blood)-ji kikümdong nung mezüloka ayutsü, aser iba shi soa piyazü minokba amtsük takong denji achitsü parnok dang Tsüngremi ozüng agütsü, aser iba aonung kibong shia kidang Yihova Tsüngrem sua ao, aser shir kikümdong nung san azü mezüloka maka, par kibong nung jabaso mezüng asoba aser shiruru mezüng mepuba ajak tepset. Israel kin otsü nung iba aonung ya kanga tongtipang otsüsutsü tatalokba ka liasü.

Anungji Israel nunger Kannan lima tonger külena iba "Kümtetsü Benjong" ya mesamadaktsüi tanü putu tashi kanga metsüngareta amunger. Israel nunger par sobaliba nung tebur tain senso tajung kati küm asem nung khen danga iba benjong amungi par limai marura, Yihuda nunger senso nungi jentoker ta otsü zülurtemi ashir. Asen Aor tang masü, Naga nunger tangar kintema iba Moatsü aser Tsüngrem-mong den mesuktepa par sobaliba benjong kanga metsüngareta amunger. Aji oda, asen Aor sobaliba nunga iba Moatsü aser Tsüngrem-mong ya otsüla-oboula nungeri kodaser kanga metsüngareta munga aru ta asenoki bushidangra, Yisu yimsu osang tajung asen limai marudang, otsüla oboula nunger par limapur mapang Lijaba, Anungtsüngba, Longkitsüngba, Meyutsüngba aser Sung-Lung dang tsüngrem ta jar külema lia aruba mapang nung suaka, parnok-ia asen mimchir yanglusang, aser asenok nem kechisarena moatsüsang tsüngrem ka lir ta amanga aru. Anungji kodang alu tasen leptoka, jitoka rongteter külen metsüjangnatsü rema alu mapa ajak temdir, parnokki alu nung metsüjang arembaji alinung tarutsü mesen, ozü sangnu, susang-koya aser yipro-mepong tesashi nungi kümzüker, tsüksung-insung sudakjang aser jenti moajang... ta parnokki amanga külemba tsüngrem dang temoatsü meshia anogo terok nu tashi küküa among, iba dangji parnokki Moatsü benjong ta aja. Aser Moatsü ya yimtsüng kari April ita nung munga aru aser yimtsüng kari May ita nung munga aru. Ajioda, Aor-sa asüyongjia ongpanglen aser azünglen alu adenba aser metsüjangnatsü yokba mongpo terabo tepila lir asünung, iba mongpo apir munga aru. Ano tsüngrem-mongjia alu nung tsük rozüka, sungjanglijang ajak ongzüka alu mapa ajak demer külen, parnokki amanga külemba tsüngrem nem tenungsang agüja küküa among, aser iba dangji tsüngrem-mong ta aja, aser iba benjong ya-a alu aroba mongpo apir yimtsüng shia pei pei sasep munga aru.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pope Francis-i Mongolia linük semdangtsü



Taoba ita Mongolia nung Archbishop, Giorgio Marengo-i Vatican nung Pope Francis ajurudang tangokba noksa nung angur.

June 03, 2023: Pope Francis-i August 31 nungi September 4 tashi Mongolia linük semdangtsü; iba linük nung Khristan nütsüng 1,300 shi dang lir.

June 3 nü Vatican-i sangdong ka ajanga, Mongolia Tir aser Khristan lenirtemi jaokba nung ajemdaker Pope-i iba linük semdangtsü, ta metetdaksü.

Vatican otongdar, Matteo Bruni-i, taruba hopta ishika tsüngda Pope-i Mongolia semdangtsü aliba osang tejangja metetdaksütsü, ta ashi.

Yaküm August ita nung Pope Francis-i Mongolia nung mezüngbuba cardinal,

Italy nunger Giorgio Marengo Archbishop shima liasü.

Taoba ita Marengo-i Rome semdang aser pope den senden mena liasü.

Vatican osang ajanga ashiba agi, nütsüng million 3.3 aliba Mongolia linük nung baptiba Khristan 1,300 shi dang lir.

U.S. State Department ajanga ashiba agi, Mongolia nung nütsüng shilem 60 shi yimsü balala amangertem lir aser tanüngba shilem 40 ji Tsüngrem dak mamangertem lir.

Mongolia nung tamangertem shilem 87.1 Buddhist, shilem 5.4 Muslim

nungertem, shilem 4.2 Shamanist, shilem 2.2 Khristantem aser shilem 1.1 tanga yimsü amangertem lir.

Akhidang 'Outer Mongolia' ta ajaba linük ya 1921 küm tashibo China shilem ka liasü saka taoba mapang Soviet Union teyari ajanga 1921 küm nüchiso angu. Inner Mongolia bo tang tashi China shilem ka lir.

Pope Francis-isa August 2 nungi August 6 tashi Portugal linük semdangtsü aser Lisbon nung World Youth Day amongba den Fatima nung temeshi tesem semdangtsü.

Sangküm Pope-i India semdangtsü tebilemba lir.

Uttar Pradesh state nung pastor tenet bail nung chiokogo

June 03, 2023: Uttar Pradesh nung anti-conversion ozüng kübok pastor tenet bail nung chiokogo; India nung temaba court-i tiyongtsüi aita inyakba ajanga lower courts-i parnok bail nung chiokogo.

Pastor Ajit Sharma taküm May 8 nungi jail nung puoka liasü saka June 2, 2023 nü Uttar Pradesh kübok Kushinagar district & sessions court-i pa nem bail agütsü.

Pastor, David Asthana ta Uttar Pradesh yimtiba, Lucknow nungi lir; pa tesüiba ita pongu tashi jail nung liasü saka June 1 nü Allahabad High Court-i pa bail nung chiokogo.

Uttar Pradesh nung Khristantem temeden atema inyaker pastor kati, "Atangji iba ya onok atema anisüngzük tuluka lir aser sayatenya atalokba lir," ta ashi.

"State nung court balalai bail agütsütsü kanga tasak, talisa anti conversion ozüng kübok aitsürtem

nem bail agütsütsü kanga tasak. Ajisüaka Supreme Court-i tekümdangtsü ka metetdaksüba sülen tan ita nungi iba tensa melenshiogo," ta meimchir temeden atema inyaker, Dinanath Jaiswal-i metetdaksü.

May 2, 2023 nü Supreme Court-i lower judiciary dang bail magütsüba atema tasüngdangba akaba den külemi Allahabad High Court dang tamalen tetuyuba ka tashi mangba atema judge ka mapa nungi anenjang, ta tuyua liasü.

June 2 nü osangbener den jembidang Jaiswal-i, "Temaba court-i obendang tesashi agütsüba ajanga onok indang bail ken otem nung telangzüba tajung nguogo," ta ashi.

Nütsüng teimba aliba state, Uttar Pradesh nung 2020 küm anti-conversion ozüng tasen ka agizüka liasü. Iba ozüng ya talisa Hindu nungertem Khristan mesüra Islam yimsü dangi meyipdaksüba nokdangtsü

atema lir.

Nütsüng million 200 aliba Uttar Pradesh nung nütsüng shilem 0.18 dang Khristantem lir.

Tamalen Uttar Pradesh High Court-i May 29 nü Pastor Kamalesh nem-a bail agüja liasü. Anti conversion ozüng kübok Lower courts-i pa indang bail temepishiba aiben magizüki liasü, ibayongji pa ita 5 shi jail nung mongogo.

May 26 nü Kaushambi nungsa district & sessions court-i pastor pezü-Maharaj Saroj, Umakant Mauriya, Mahendra Kumar aser Ved Prakash nunger nem bail agüja liasü.

Tesüiba hopta ana tsüngda court balalai Khristan 12 bail nung chiokogo.

United Christian Forum (UCF)-i ashiba agi, 2022 küm Uttar Pradesh nung Khristantem anema inyakba tatalokba 149 liasü aser ibaji linük nung Khristantem anema inyakba tatalokbatem rongnung teimtiba liasü.

ANOGO ABEN TSÜNGREM DEN

MAPA AGI TENOKDANG

"Martha sorochioktsü mapa jenti agi temulung timtemdaksüi. " Luk. 10:40

Lk. 10:38-42 nung Mary aser Martha otsü angur. Mary Kibuba tetsüng nung menür Pa o anga, saka Martha mazüngi mapa inyak. La "mapa jenti agi temulung menendaksü" aser Kibuba dang angaba senzüka yutsü.

Asenok kanga dang mazüngi alir. Anepdang anü adokba nungi aonung tesü tashi mazüngi lir anogo odaktsür. Ki mapa, office mapa, tanür anepaluba, lesson sayuba, telok mapa, Arogo mapa, yimden mapa aser yamala agi asen mapang ajak sünger alir. Sentong kaji koba tajung aser koba tajungtiba, koba tejangraba aser koba nüngdak, koba tongtibang aser kobabo tongtibang masü ibaji bendanga melitetra jangratema, aika inyaktetba malitsü aser nüngdak masüba nung mapang omatsü.

Tanela aser tamangba maparen nunga mapang jenti intoka tenzüker, tangar yarir, kiboksem mapa inyaker, sayur, sarasademtsür aser yamala mapa kanga mazüngi kidang maneni inyaktsü akok saka Tsüngrem den mapang entokba melira, Lai bushiba melira tajung inyaker saka tajungtiba senzüka yutsür akümstsü. Anungji tajungji masü tajungtiba bushidi, tenzükba tama masü Tsüngrem den tesentaktep tama sudi.

Sarasadem

O Kibuba, ni tajungtiba shitettsi Ne taochi küa. Amen.

Europe tesem ajaklen osangtajung proktsü atema lanurtem jaoker

June 03, 2023: Tan mei mapang nung Evangelistic Project tuluka ayongzüka Europe tesem ajaklen osangtajung proktsü aser lemsateptsü atema lanur Khristantem jaoker.

Operation Mobilisation (OM) UK-i Europe tesem balala nung Yisu Khrista memetetertem den osangtajung lemsateptsü atema arrshi küm 18 ser tempur lanurtem nem maongka agütsür.

Evangelistic Project ya June ita tatabanglen nungi August ita tom tashi agitsü aser iba sentong nung shilem agitsüpurtem continent tesem balalai anir aotsü.

Iba project ya OM tentetsang, George Verwer-i apiteta liasü saka pa taküm April ita nung süadokogo.

Taküm osangbener den iba project atema jembidang pai, "Iba project nükjidong ya asentensi alitsü aser nisungtem taküm melenshidaksütsü atema lir," ta metetdakja liasü.

"Khristan tasenpurtem dang masü saka telempet tamangertem aika lir. OM atema volunteer süa lanurtem nem shilem agidaksütsü kü tejangraba liasü," ta pai ashi.

Race Across Europe kübok lanur Khristantem Europe

kübok linük 15-i anir aotsü aser Arogo balala nung dendakja shilem agidaksütsü.

Yimti shia nung parnoki refugees aser tanurtem den Khrista osangtajung lemsateptsü.

Lanurtemi Race Across Europe nung shilem agiba ajanga lanur Khristantemi Khrista osangtajung proktsü atema tasü aittsü, ta OM-i imlar.

OM UK nung Relations Manager, Lara Jenkins-i, iba mapatong ya lanurtem tasü itdaktsütsü aser ser mission wadang nung temelung lemdaksütsü atema lir; parnokisa osangtajung prokba yimya balala aika angazüktü, ta metetdaksü.

Laisa, "Parnok August ita nung pei kidangi meyipa arudangbo Tsüngremi mapa inyakba parnoki jangjatsü aser aika angatettsü," ta metetdaksü.

"Anungji tan mei mapang nung lanurtem tesem balala semdanga tamang jenjang lemsateptsü atema onoki lanurtem jaoker," ta metetdaksü.

Race Across Europe ya June 26 nü tenzüktü aser ita ana agiba sülen August 18 nü UK-i meyipa arutsü.

Iba project nung shilem agitsü jangrartem atema registration June 11 tashi agitsü.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Rangben

(adj) melemsai, ajonga, ajak (whole, entire)

* Benjong kiburi onok nem ak **rangben** ka agütsü.

Rangdagnükpok

(adj) tenükbo lapoka lir ser nung manguba (blindness with open eyes)

* Ni' Dimapur yimdong nung **rangdagnükpok** meshimetsür ka ajuru.

OLONG PAITEP # 6535

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPIEN

- 2. Teburtemi tejak nung awaba
- 6. T ___ em
- 8. Tzük ayudak
- 9. Nüngdakba dang timba
- 11. Züina ao
- 12. Yangi tzü angur
- 14. Tangar dang nungi tali
- 16. Senyong masü
- 17. Oadokdi
- 18. Tzü tarok
- 19. Yimtaklir aikati iba ya ki den külemi yanglusemer

LANGTSÜNGLEN

- 1. Temejangdak
- 3. Nisung ka mapa inyaksü nübo
- 4. Azüntsü asoshi mejemba
- 5. Tesangwa agütsüba
- 7. Tila masü
- 10. Tebenjem tetsür chanu
- 11. Tekolak nung inok
- 12. Tetsüngda
- 13. Tangar inyakba ka inyak
- 14. Tim masü ta ashi
- 15. Asalendong
- 16. Tanü dangtsü

OLONG PAITEP # 6534 TELANGZÜBA

TIPIEN :

- 1. Ayawara, 4. Aja, 6. üata,
- 7. Sasa, 9. Tzülu, 10. Süin,
- 12. Teki, 13. Nunga, 16. Osen,
- 18. Aksü, 19. Apu,
- 20. Alimang.

LANGTSÜNGLEN :

- 1. Azüita, 2. Aitsü, 3. Awatsüng,
- 4. Ara, 5. Aren, 8. Lumiseta,
- 11. Tazüng, 14. Noksa, 15. Tera,
- 16. Oru.



WARAKLA O ALOKBA NA KIBONG NUNG PETSAPRONG ANGASHIA PASTORBA ARUR :

- Pastorba** : Ya kechi asü nüna yamai kiyong ajak metangtoka asateper?
- Alokba** : Pastorba na, yamai dang ozü kibong ya ao nungbo majungtsü, kibong telongi luja luogo.
- Pastorba** : Wa kechi asü kü danga rasaa shiangma.
- Alokba** : Ya oda ashir ashi ozü kibong ya ni hajera aoba agiang konorokom solar nung ozü tantsü ya tanü asüng kechi An lain asü Ak lain ar to, mobile dang metsükshia kazütsü aserbo anogo ishika lir asangur kati motorbike nung arur dang süoshi, tsüngsem, tejak tebang nung anütsü mozütem ya, oda hopta kata mezüdoki mangajen mangarba, ni hajera agi aaba jagi meperirji sen interest nung apua sentsü agi tsü pangogo niini.
- Pastorba** : Oh ho, ni angatetogo, tanü kibong aika ayatai tiai aibaji iba "On line shopping" ya ati. Mobile ajanga dang e banking amshia sen yokteterjito, kecha tashi maliangto. Yamaji dang kibongtemji telungi alutsüato, taji Waraklai kibong atema pilema acha ayangangma.
- Warakla** : Haini Pastorba.

- Lilir : WhatsApp

Meghalaya CM Conrad-i agriculture response vehicles sayatsü



Shillong, June 3, 2023

(Agencies): Meghalaya chief minister Conrad Sangma-i Tura nung PRIME Agriculture Response Vehicles 10 sayatsüogo.

Iba ya Garo Hills region nung aluyimertem aser aluyimer teloktem atema lir. Ano, maneni state sorkari ARVs 35 agütsütsü.

Meta talang pilar alidak aluyimertemi transportation facilities ajanga tetsükdaktsü ajuruba khuret lemsatop.

State sorkari ARVs ya 50% subsidy nung agütsür aser iba ajanga transportation jenjang ajema aküimtsü aser aluyimertemi

tsünütetba jenjang dalang agi yoktetsü.

CM Conrad-isa Garo Hills region atema seed balls lema agütsü. School 297 nung seed balls lakh 59.4 alemtsü.

Meghalaya state ajungalen sorkari seed balls million 3.6 alemtsü sentong lir.

Green Meghalaya mesüra Payment for Ecosystem Services (PES) Scheme kübok Rs 3.02 Crores senotsü teyari agütsüogo.

CM Conrad den külemi cabinet minister temi India sorkar indang Mission LIFE

initiative nung shilem agia süngdongtem atem.

Meghalaya-i World Environment Day matongdang saplings lakh 5 atemtsü alizüng yua lir. West Garo Hills District kija nung sapling 75,000 atemtsü.

Meghalaya sorkarisa Garo Hills region atema 'KYAN' lema agütsü. Iba ya Digital Teaching Device ka lir.

'KYAN' portable device nung computer, projector, Audio, Wi-Fi & Bluetooth connectivity, audio video conferencing facility aser in-built interactive touch feature keta lir.

Sivasagar district nung KLO telungpur ka apu

Guwahati, June 3, 2023

(Agencies): Assam police-i Honibarnü Kamtapur Liberation Organisation (KLO) telungpur ka puogo.

Sivasagar district nung parnoki Mridul Barman ta ser KLO züngsem ka apu aser pa ya Charaideo nungi lir.

Barman-i United Liberation Front of Asom-Independent (ULFA-I) den tesentaktep liasü ta tai tonglokja lir.

Police nungi osang tejangja kar angashiba sülen pa Sivasagar

nung aliba tsüingsü bushitet aser apu. Ketdangsurtemi iba dak sendakba nung jungjunga bushisüngdang südar.

Kamtapur Liberation Organisation (KLO) ya India kübok northeastern region nung telungpur telok ka lir. KLO ya Assam aser West Bengal state tem nung kanga bulua inyaksangshir.

Parnoki Assam aser West Bengal state ana nungi "Kamtapur" ta ser state balaka tentetsü atema alizüng lir.

KLO ya 1995 küm tentet aser parnoki Kamtapuri oshi jembirtem atema temeten aser ketdangsubaren balaka atema rarar.

Kümtem süia arudang KLO-i ozüng alema mapa inyaka arur aser iba nung parnoki security forces makogo, bomb pokdaksüba, tashiyim agi sen saruba aser züngsem aniokba maparen inyakba dena lir.

India sorkari Unlawful Activities (Prevention) Act kübok KLO ya noktanga lir.

Assam SCERT ken o dak sendakba nung RTI activist 2 apu

Guwahati, June 3, 2023

(Agencies): Assam nung Rs 105 crore-State Council of Educational Research and Training (SCERT) ken o dak sendakba nung RTI activists ano ana puogo.

RTI activist ana ya Benin Doley aser Rajib Kakati na ta jangjaogo.

Benin Doley-i Rs 5 lakh aser Rajib Kakati-i Rs 7 lakh angu aser iba ya official SCERT bank account nungi Real Time Gross Settlement (RTGS) system ajanga enoktsü ta osang ajanga ashi.

Chief Ministers' Special Vigilance Cell (CM's SVC)-i tena dang ghonda ishika asüngdangyaba sülen apu. Ano vigilance cell-i nisung ishika aputsü imlar.

Iba ken o nung temulung meleme bilemertem rongnung senior journalists aser political party lennirtem dena lir.

"Rs 105 crore-State Council of Educational Research and Training (SCERT) ken o dak sendakba nung journalists aser RTI activists dena nisung 12 aputsü akok" ta Chief Minister Himanta Biswa Sarma-i shia

liasü. Chief Ministers' Special Vigilance Cell (CM's SVC) ajanga nisung 12 dak tenük yokdar ta CM Sarma-isa ashi.

Taoba Mongulbarnü ketdangsurtemisa journalist ana aser RTI activist ana puogo.

Journalist anaji Pujamoni Das o Bhaskar Jyoti Hazarika aser RTI activist anaji Anup Saikia o Rabijit Gogoi na lir ta jangjaogo.

Parnoki IAS ketdangsur Sewali Devi Sharma amokmerena aser merenshia senotsü aika meshizüka agiba atema tai tonglokja lir.



Mizoram sorkar indang General Administration Department-i Association for Voluntary Blood Donation (AVBD) aser Central YMA den külemi ita ka piyong mega blood donation drive sentong tenzükdang agiba noksa angur. Remna Ni nungtem nung June 2023 ita piyong iba mapa inyaksü aser Dawrpui Multipurpose Hall nung Mizoram Chief Minister Zoramthanga-i sentong lapokja liasü.

Ozü sepai yirutsütsü mechi Russian mitkari mines rema yutsü: Prigozhin

Moscow, Aami/June 03 (Agencies): Russia nung Wagner mercenary force tekolakba Yevgeny Prigozhin-i Russian armed forces lenirtem den maneni o agi rarateper aser parnok Bakmut nungi meyiba aodang Moscow bukuma sepaitemi par sepai yirutsütsü atema tapoktsü rema yutsü ta aitsü.

Wagner mercenaries tem ita aika Ukraine anüdoklen Bakmut jila nung rara arua par züngsem aika asüba sülen parnok timbaka iba jila nungi ainshiba mapang Prigozhin-i iba o ya Hokulbarnü jembia liasü. Raksatsür aliba jila nung Wagner kübok aliba tesemtem Russian army nem agütsüogo, ta pai ashi.

Tesülen tesem ter dak tema nung Russian defence ministry ketdangsür temi anti-tank mines noklang aika densema tapoktsü oset balala rema yuja aliba par nisung temi ngutet, ta Prigozhin-i Telegram nung zülutsü.

Kechiba mines tem ya rema yutsü ta asüngdang dang lenirtem nungi totuyuba agütsüba lir ta defence ministry ketdangsür temi ashi, ta Prigozhin-i ashi.

"Tsükchir nokdangtsü asoshi item tesemtem nung tapoktsü oset aremstsü nungdak mali,

kechiaser item tesemtem ya tesülen lir," ta pai ashi.

"Anungji, item tapoktsü oset ya Wagner indang unit tem dak tenük yoker aremba ama angateter," ta Prigozhin-i ashi.

Item oset kata mapok aser kata meyiru, ta pai ashi.

"Ibai yimjak nung onok dak azüktsü merangba amai angateter."

Russia indang defence ministry nungi telangzüba kecha agüja mali.

Bakmut amaktsü asoshi Russia lenirtemi onok nem injang bomb peria magütsür aser ozü sepaitem bendanga amshir, ta Prigozhin-i ita aika tenüing sena aru.

Wagner tekolakbai Russian mitkar lenirtem aitsüba ama ano Moscow bukuma mitkar lenir katia aija aru, shiba Ukraine nung rara liasü, anungji iba rara nung Kremlin den sendaktepa alirtem tsüngta mangatetep adokba sayur.

Brehostibarnü video message ka nung Chechen lenir Ramzan Kadyrov den tesendaktep kanga junga alir Adam Delimkhanov-i Prigozhin aitsü aser pa ya blogger ka lir aser teti asatena alir ta ashi.

"Na blogger ka akum aser tebilemstsü ajak asoshi alima ajunga dang ayimtena sayur.

Asatenba, ayimtenba anenang," ta Delimkhanov-i ashi.

"Nai mangatetra onok den jembitsüla aser tesem aser mapang ashitsüla, nai mangatetra ni aser onoki rateta ashitsü," ta Prigozhin dangi yokba message ka nung Delimkhanov-i ashi.

Iba message ajanga Wagner indang most senior fighter Dmitry Utkin-i ain adok aser merenshia liasü.

Utkin ya taoba mapang special forces officer aser Russian military intelligence nung tenzüka liasü.

"Kong nungi iba amala temesüktep ya aru: yamaji jembitsü nü nem shibai temeden agütsü?" ta Utkin-i message ka nung ashiba Prigozhin-i Telegram nung tanaben post sütsü.

"Senso kar asen maksü asoshi jara ama amshitsüla. Tejak o tejak jitepa jembitsü onok teti renema lir," ta Utkin-i ashi.

Taoba küm Prigozhin-i Russia lenirtem aitsüba Chechen lenir Kadyrov-i bukuma liasü, saka tawa parnok tesendaktep tamajungba akum.

Kadyrov ya Russia Tir Vladimir Putin den tesendaktep tajung lir aser pai defence ministry aitsüba o mejembii arur.

MENUNGRA BILEMTETER



Lt. O Temjensangla Tzüditsür (Molungkimong)

Temeim kinüngtsü na taoba küm 4th June 2022 anogo iba akümüli doktsür or na mali onok küm ka süia aodang küm meyi ka ama onsara-a longraseta bilemer ako. Nü temeim, nü inyakyim sama balala tem ano na menürem jakden, kodanga mapa agi malakla ajak teyarinü tejungnü anogo shia onok atema sarasadema nüklai arur aser onok molungjang sünepa alirako no itemji kodanga mamateter.

Nai doktsür aoba temeim jabasotem semchir aser medemsor na mali rongjenseta sarasadema amonger.

~ Temeim, Kinüngbo, chirnur, semchir, anükapang molung ajemertem.

Myanmar nung mitkar agi anünga akumer

Naypyidaw, Aami/June 03 (Agencies): Myanmar mitkartem nübu agi anünga akumer, anungji iba southeast Asia linük nung democratic maparen ajak anentsür aliba mitkartem asoshi tayongzükba lir, ta Nikkei Asia report ajanga ashi.

Mitkartem ya democracy bukuma nokakba teloktem den teraradak aser iba iba osang ajanga ashiba agi, tashi ya item telok tsütsü aor.

"Myanmar mitkar tem tajemba akumer aser nübu agi kanga anünger," ta Unted States Institute of Peace nung visiting scholar Ye Myo Hein-i iba report nung ashi, koba May ita saya liasü. Mitkar temi tashiyim amshia sorkar atsüngdokba sülen Myanmar army tongpang nung 13,000 asü aser 8,000 shi army nungi ajen mesüra yutsü ta report ajanga ashir.

Mitkar lenir temi Aung San Suu Kyi'er National League for Democracy anentsür mapang tatsüka lir iba osang ya angashir. Yangji Myanmar air aser naval forces den ano sendaktepa aliba corps tem bendenra Myanmar Sit-Tat (armed forces) ya 150,000 shi alitsü, ta report ajanga ashi.

Taoba mapang Myanmar mitkar züngsem 300,000 nungi 400,000 tsüngta alitsü ta takzüa liasü saka tawa report ajanga ashiba agi, tazüng aliba asüngtsüsa sepai shimoka mali.

Züngsem tasen shimokba nung timtem ajuruba ya talisa mitkar temi tashiyim amshiba

lanurtemi magizükteba nungi adoker ta ashir.

Mitkar temi par anemer dang taochi mesayuba ajanga 2021 sülen democracy ajangshia aliba lanurtem tezü atanger. April ita mitkar temi Sagaing yimtsüng nung bomb poklokja nisung 160 dak tema tepset, shirnok National Unity Government ajanga lapoka aliba office ka nung adenshia liasü.

Aung San Suu Kyi-i azüdokshi nungi pila alitsü merangba nung yamakok ajuru aser mitkar yimsüsüba anemer temi tenük melen tenük agitsü ashir. People's Defence Forces-ia mitkar dak tesem balala nung amak tenzük.

Mapang ka mitkar anemba telok temi shikaridang amshiba rifles aser kidang yangluba nok-nü amer rara liasü, saka "ethnic armed organisations, Thailand, local production" nungi aser mitkar nungi hadir peria angur, ta teshisadanger temi Nikkei Asia dang ashi.

Mitkar aser parnok anemer tsüngta raraba maneni tali akumer. Human Rights Watch ajanga ashiba agi, mitkar temi November 2022 tashinung nisung 2,400 tepsetogo aser democracy bukumer 16,000 dak tema puogo.

National Unity Government ya Myanmar mitkar den mapang talangka nungi rara aruba ethnic minority telungpur telok balala den lungjemer democracy movement tenzüka lir aser parnoki temelenshi ka aginer ta ashir.

Turkey tir inyaktsü Erdogan tenangzüktep agitsü, cabinet tasen shimtsü



Recep Tayyip Erdogan

Ankara, Aami/June 03 (Agencies): Election tanaben agishiba nung takok anguba sülen Turkey Tir Recep Tayyip Erdogan ya linük tekolakba ama tenangzüktep agitsü renema lir, shibai küm 20 yimsü süa arur ano küm pongu yimsü asütsü.

Arishi küm 69 tain leniri Honibar nikongdang pa indang cabinet shimtsü, shirnoki linük rongsenketzüng nung timtem ajurua aliba ketdang asütsü.

Turkey nung talangtiba lenir inyaksang ya West den mangatetep adoka lir aser diplomatic tsütsü tayongzükba jenti ajurutsü.

Honibarnü parliament nung inauguration sentong agiba sülen linük yimyibam Ankara nung tir aliba tesem nung ano sentong tuluka ayongzüktsü, kong alima nung lenir aika arua adentsü.

Turkey nung temelenshi arudaktsür saka telemsa

adokdaksür lenir yagi May 28 nü election agishiba nung tashi tait opposition coalition madak takok angu aser rongsenketzüng tsütsü timtem ajurua aser February ita menoknok tesashi anoka nisung 50,000 dak tema asüba sülen pa kanga sashia aijaka pai takok angu.

Erdogan-i vote shilem 52.2 angu aser pa den toktepsang Kemal Kilicdaroglu-i shilem 47.8 angu ta official results ajanga sayur.

Linük indang rongsenketzüng tsütsü timtem ajurua aliba ya Erdogan asoshi teinyaktsü mezüngbuba asütsü, kong osettsüset nung jenjang atuba ya shilem 43.70 lir, koba pai interest rate ajemtsüba ajanga shilem kar lir.

May 14 election sülen Hokulbarnü mezüngbuba session nung Turkey indang parliament züngsem tasentem tenangzüktep agi tenzük, kong

Erdogan dena liasü. Parliament menden 600 nung par alliance ajanga menden timba nguteta lir.

Kilicdaroglu-i anir opposition coalition lungjemer nokdakaka Erdogan-i takok ngua liasü.

United States-i aniba defence alliance, NATO nung Sweden adentsü merangba atema July ita senden mamandang Ankara nungi temelaba agütsütsü NATO züngsemtem yongyaseta atar.

Erdogan-i iba application agizükba nung tetsüng majemoki arur aser Stockholm-i outlawed Kurdistan Workers' Party (PKK) indang kiralongrar tem jenokdaksür ta aitsü, koba Ankara aser par Western allies tem kiralongrar telok ka ama züngshir.

Erdogan inauguration nung NATO tekolakba Jens Stoltenberg adentsü aser pa den jembishinü akatsü.



Russia nung Belgorod region indang governor-i ashiba agi, Hokulbarnü Ukraine-i arütsü anasa jila tem nung anaben amakdang nisung pezü asü. Anasa aliba region tem nungi ketdangsür temia aonung tepiyong drone amshia amakba ashir. Ukraine north tsütsü Kharkiv region nungi kilometre 15 shi pilar Maslova Pristan jila nung injang bomb khaloktsüba mapang iba bomb teraksa agi ajanga aoba gari tem nung kongshi, ta Governor Vyacheslav Gladkov-i Telegram nung zülu.

Real Madrid-i Chelsea forward Kai Havertz aginer



Jorge Pereyra Diaz

Madrid, Aami/June 03 Chelsea forward ya ka lir. (Agencies): Chelsea Football Club nungi asayar Kai Havertz ya Real Madrid-i aginüba osang ka angazüker. Madrid coach Carlo Ancelotti-i taruba season nung par squad melenshiner aser asayartem tenüng nung Havertz tenüng ya inoksema lir, shiba takum summer transfer window nung club melentsü akok.

Transfer market specialist Fabrizio Romano-i iba onük ya tweet ka ajanga benok. Romano-i ashiba agi, Real Madrid dak Havertz aginüba tejangja lir aser coach Ancelotti-i sapuba asayartem rongnung

Chelsea forward ya ka lir. "Havertz atema jembishinütsü Chelsea-i molunga aliba angateter, saka parnoki taa tajung aginer, loan mesüra iba ama masü," ta tweet ajanga ashi.

Taküm season nung Real Madrid-i junga masayatetba sülen temelenshi tulu aitsü imlar. Parnok ya La Liga title asoshi toktepba nung Barcelona-i atsüngdok aser Champions League nunga Manchester City-i tsükdaktsü.

Karim Benzema-i Madrid yutsütsü indang osang aruba mapang pa melentsü asoshi striker bushitsü matateter.

Saudi Pro League nung asayaba Al Ittihad club ajanga Karim Benzema ya sen aikati alizütsü tejangraba aliba angazüker. Arishi küm 25 tain France nungi Benzema-ibo Santiago Bernabeu nung ano season ka asayatsü tejangraba lemsatepogo.

Karim Benzema melentsü asoshi Kai Havertz ya tetemjen bo masü saka German nungba ya inoksema ajanga Madrid attacking tajungba akumtsü.

2020 küm September ita Bayer Leverkusen nungi Chelsea-i aoba sülen West London club nung Havertz-i tajung-tamajung ajak ajangshia arur. 2020-21 season nung Chelsea-i Champions League takok marok ajungketba mapang Havertz ya rongnir ama Manchester City den final asayandang takok goal pai agüja liasü.

Taküm season ya Havertz asoshi jangratemsübo masü, kechiaser Premier League table nung Chelsea ya jenjang 12 buba nung tembang. Parnoki league games 38 asayaba nungi 11 dang akok. Havertz-i taküm Chelsea asoshi 47 ben asayaba nung goal 9 dang agütsütet. Pa Stamford Bridge nung alidang Havertz-i game 139 nung asaya, goal 32 agütsü aser assist 15 lir.

Mourinho-i referee merenshiba atema UEFA-i ken o benok



Roma coach Jose Mourinho-i Europa League final Sevilla den asayandang referee den o tamajung jembiba noksa angur.

Aami/June 03, 2023 (Agencies): Europe nung football asaya ketdangsuba tentet UEFA ajanga Roma coach Jose Mourinho anema ken o benoka jembia tenzütkogo, shibai Europa League final Sevilla den asayandang referee mezüngmeshi aser o tamajung jembia liasü.

Arishi küm 60 tain Mourinho yagi Bodhbarnü final asayaba sülen Budapest nung stadium car park nung English referee Anthony Taylor ya tamakitsü nisung ka, ta ashiba video nunga angu. Iba asaya nung telok anaprongi goal ka-ka agütsüba sülen penalty metsütepba nung Sevilla-i Roma madak takok ngua liasü.

Roma coach Mourinho nem Taylor-i yellow card agütsü aser asaya temer osangbener den jembidanga referee aija liasü.

Iba asaya nung asayartem aser ketdangsurtem asayadak moapu aser technical area nung raratepa liasü.

Team anaprongi tim masüba mapa inyak ta UEFA-i aitsü, koba yellow card pongu sayuba sülen activate asür, aser ano terepranger temi meinprongba

asertsettsüset raksatsüba atema Roma aitsü.

Sevilla ya aitsü, kechiaser asaya temer terepranger ter dak tema asayaba moapu nung aita liasü.

Iba asaya nung Taylor-i asayar 13 nem yellow card agütsü aser item rongnung par tenet Roma nungi liasü aser aibelen aika aliba ajanga asaya menur tembang.

Brehostibarnü Budapest nung aliba airport nung Roma fans temi Taylor aser par kibong mkerenshi aser o tamajung ashi. Airport security temi pa aser par kibong café ka nungi danga tesem kati anizüker ao.

"UEFA Europa League final nung referee mapa inyaker kidangi meyipa aodang Anthony aser par kibong mejungi amshiba ngua onok aoksar aser süngmanger," ta referee temi tentetba PGMOL ajanga ashi.

Premier League-ia tweet ka nung, "Yashi ama shingaia tatok magütsütetba yimya amshiba ajanga tim matemtsüla. Anthony ya asayar ketdangsur tajungtem rongnung ka lir aser onoki pa aser par kibong bukumer," ta ashi.

Thailand Open: India nunger Lakshya Sen semi nung tsükogo

Bangkok, Aami/June 03 (Agencies): Honibarnü Thailand nunger seed tanabuba nung alisang Kunlavut Vitidsarn den tebur kija semifinal kanga meranga asayar Lakshya Sen tsükba sülen Thailand Open nung India nunger kata mali kumogo.

Almora nungi arishi küm 21

tain Lakshya-i mezüng set nung takok anguba ajanga pai ayong ayonga akoktsü ama bilema liasü, saka ghonda ka ser minute 15 asayaba nung 21-13, 17-21, 13-21 agi tsük.

Danga semifinal ka nung Hong Kong nungi seed ti nung alisang Cheuk Yiu Lee aser France nunger Toma Junior Popov asayatsü aser tena

asaya nung takok angusang den Kunlavut final asayatsü.

Tang season nung Lakshya asoshi ibai semifinal mezüngbuba liasü aser Indonesia Masters nung pa quarterfinals nung tsük.

Taküm pai junga masayatetba ajanga ranking nung jenjang trok buba nung aliba jenjang 23 bubai aluogo.

Rafael Nadal ita pongu tennis masayatetsü



Rafael Nadal

Paris, Aami/June 03 (Agencies): Rafael Nadal telongpu nung surgery ka agiba sülen pa ita pongu tennis asaya nung shilem magitetsü, ta pa indang representative kati Honibarnü ashi.

French Open asayamung takok marok 14 ben tashi nguteta alisang Nadal ya tebur joint-record 22 majors takok nguteta lir aser Australian Open round tanabuba asaya nung telongpu yiruba sülen January ita

nungi asayamung kata nunga shilem magiteter.

"Rafa ghonda ishika tsüngta 'progressive functional rehabilitation' tenzüksü aser ita pongu nun gang taneptsü jungjunga ngutetsü ta asadangteta lir," ta Benito Perez-Barbadillo-i ashi.

Arishi küm 37 tain Spain nunger Rafael Nadal-i professional player ka ama 2024 ya tatem asütsü akok, ta shia lir.

Mezüngbo pa hopta ti tashi asaya nung shilem magitetsü liasü, saka Madrid aser Rome nung claycourt tournaments nung masaya aser taküm Indian Wells, Miami, Monte Carlo aser Barcelona nunga mesayatet.

2005 küm sülen tang mezüngbuba Nadal ya world ranking top 10 teküpokleni mezüngbuba March ita alua tang jenjang 15 buba nung lir.

Kohima nung KDFRA ajanga refresher & fitness test agi



Kevingutuo Sekhose aser Mhasimhalie Mathew Yhome den KDFRA nungi referee tem June 3, 2023 nü tangokba noksa nung angur.

Dimapur, Aami/June 03 (TYO): Kohima District Football Referees Association (KDFRA) ajanga new membership recruitment drive-cum-refresher & fitness test 2023 sentong ka Indira Gandhi Stadium, Kohima nung June 2 aser 3 anogotem takok ngua agia liasü.

Iba sentong nung tongti o jembia Kevingutuo Sekhose, Head of Referees (HoR) Nagaland liasü.

Iba sentong tananü buba Kohima District Football Association tir Mhasimhalie Mathew Yhome-i moaja liasü.

Iba sentong nung football referee 45 tashi dena liasü.

BILEMDANGANG

"Takum nung tamakok ajurutsü, saka nü taküm tekokdaktsü."